

癸

巳

存

稿

癸巳存稿卷十四

黻俞正燮理初

古本大學石刻記

某公循吏達官好刊古本大學自述曰乾隆丙申補五臺令讀陽明全集乃取古本大學朝夕尋繹身體力行遂於歷任所至刊龕門壁不忍聖賢真種子遂亾又曰司馬溫公全集世不多見官滇南時讀之曾因大學發揮數百言於其上方滇南諸生藏焉其自言得力者如此乃所刊於五臺保德潁州開封濟寧者皆明萬厯十二年南京戶部員外郎唐伯元所上之豐道生書當時號爲魏政和石經此又署王羲之書

癸巳存稿

卷十四

一

連筠簞叢書

按宋司馬光注大學當仁宗時時御書大學賜進士卽禮記
本宋始有別注大學不比中庸漢隋志均有單行本可言有
古別也程朱改大學後有志道學者多效之明正德十三年
七月王守仁從禮記寫出大學本文其識甚高時有張夏者
輯閩洛淵源錄反極詆守仁倒置經文蓋張夏言道學不暇
料檢五經又所傳陳澹禮記中無大學疑是守仁偽造然朱
子章句見在爲朱學者多以朱墨塗抹其章句之語夏欲自
附朱子亦不全覽朱子章句致不知有舊本可云奇怪今欲
宗陽明學亦不審覽王書窺尋禮記直以豐道生書誣之豐
道生者有心疾者也見世人多以改經名而守仁古本名較

美則亦自言有子貢詩傳及古本大學中庸出魏政和石經
中庸改竄兩節大學以瞻彼淇澳至此以沒世不忘也爲末
段中增顏淵問仁子曰非禮勿視非禮勿聽非禮勿言非禮
勿動二十二字而刪此謂知本此謂知之至也此謂修身在
正其心十八字唐伯元表上其書引賈逵言大學經之中庸
緯之又有鄭曉也者其古言曰正始中虞松等考正五經刻
之於石而大學中庸傳焉又謂松表引賈逵言孔伋窮居於
宋作大學中庸有沈曦者好此文言不讀古本如矮人觀場
而周從龍也者作遵古編以瞻彼淇澳在末段謂文武心法
在衛武公定爲子思居衛作又謂顏淵問仁二十二字乃唐

癸巳存稿

卷十四

二

靈石楊氏棻

明皇削去此數人者慷慨下筆殆有異人之稟其書初行毛奇齡云止有宋體楷字書五葉道生死忽有篆及分書本時已誤正始爲政和蓋不檢魏時年號以古刻石者皆當號政和此本則以政和刻石當是義之妙墨不謂爲陽明學者上下四方往來古今亦信之而不疑也嘉慶七年五月見打本於滋陽記其與司馬文正王文成之所以異者冀有賢者辟其石以無成循吏之過亦冀爲朱王之學者倘有畧覽朱王之書也

書春秋胡傳後

胡安國夏時冠周月之說書伊訓蔡傳亦勦其說或引日南

至在正月又言公卽位當周正朱子謂用夏正則月與事差至兩月不應如是雜亂無章張春有春王正月考朱氏彝尊謂左傳王周正月周字千金然辨之者皆一篇之文不待讀畢但執一二語辨之無當也胡氏之言曰建子非春亦明矣乃以夏時冠周月何哉以夏時冠月垂法後世以周正紀事示不敢專是胡氏明言王周正月正當公卽位日南至於事不得差也然使胡氏之論止此而已將終古無能明其謬者而胡氏又自言曰前乎周者商用丑書云元祀十有二月則不改月後乎周者秦用亥史記云元年冬十月則不改時也夫十有二月殷冬至大祀非殷正月三統所引甚明冬十月

漢武改憲後追書史注亦備胡氏之證已弱又適自害夏時
周月之說宋俞文豹吹劍錄云安國春秋傳自草創至成書
初稿不留一字是其展轉轆轤自忘其初不足名學也求胡
氏所以致謬者爲穀梁傳所誤春秋春王正月者杜預云書
王不書王視頒朔與否蓋國史舊文桓三年春正月有事而
王未頒朔也十二年春正月不頒朔又無事但舉時成年也
莊五年春王正月頒朔無事舉時成年也其但書元年春王
正月見不行卽位禮也昭二十三二十四年有王日官從東
王猶頒朔也定公以六月卽位故元年不書正月其書元年
春王三月晉人執宋仲幾于京師猶隱三年七年昭十八年

二十一年二十八年之春王三月也公羊穀梁二傳讀元年春王爲一句三月以下別爲一句杜讀左氏經亦同而穀梁且以桓元年春王爲一條王者所以正桓因與定元年春王爲類謂定始非正始故無正始二傳又謂隱二年至十一年無正月隱不自正也公羊定元年傳云卽位後也注云昭出奔當絕定不得繼體奉正春秋微時諱託之卽位後故無正月於是正字爲孔子所造劉知幾謂魏晉陽秋於帝紀書帝正月今所傳元經亦書帝正月傳云文中子曰帝之不帝久矣挈名索實此不可去呂祖謙遂謂虞正月不稱帝夏正月不稱王時天下皆知有帝王春秋時人欲肆天理滅夫子不

得已標一王字於正月之上不知虞夏書本記帝王事不得
又使奉帝王正朔春秋乃魯侯奉周王朔事不相通魏晉春
秋及元經所謂妄作尋穀梁傳云桓無王者無王之道蓋以
王字乃孔子所造古人既言王正爲孔子所造胡氏慕其義
而思出奇以蓋之則以爲春字亦孔子所造而義託之行夏
時此所謂悠謬之言心不欲以爲是口不能證其非雖與穀
梁並立可也而自言云古不改月如其說則是周本稱十一
月孔子改爲正月胡氏謂春秋非周月也又云古不改時如
其說則是周從夏稱冬十一月孔子改爲春正月胡氏謂春
秋變夏時也又云夏時冠周月如其說則必古改月而復可

別之爲周月必改時而後可別之爲夏時也自古兩說相背必兩人持之從未有兩說相謬綴爲一篇如胡氏說者則甚矣胡傳之不足爲書與辨之者之疏於披覽也

書古文尙書冤詞後

吾聞之鄒平成君瓘謂今枚文爲魏晉人書者非冤也古文非伏生所有二十五篇又分出伏書五篇者奏上於晉大行於唐疑於宋至元明人則憑虛詬言之漢以伏生二十八篇益以泰誓置博士藝文志所謂經二十九卷者是也志又云尙書古文經四十六卷則漢書後漢書並云魯共王得壁中書還之孔氏孔安國上之未得施行然藏爲中經故志得錄

之安國又自傳司馬遷及都尉朝以次傳膠東庸生清河胡常號徐敖平陵徐暉河南桑欽此皆不立學官而見儒林傳者扶風賈徽受書於暉徽傳子逵見本傳杜鄴亦扶風人後漢書儒林傳云杜林傳古文尙書林鄴子也魯國孔僖者亦世世傳古文拜郎中其時自安國所傳於外之古文若有違僖以古文立朝必能舉之矣林傳濟南徐巡東海衛宏宏定古文官書逵傳孔氏學爲林作訓馬融爲之傳鄭君爲之注解其傳授則劉歆移文所云古文舊書藏於祕府轉問民間則膠東庸生之學與之同外內相應鄭本有注無注及伏生先出之書皆孔子所見之文也今其書非先立博士者則皆

不傳而隋人劉光伯引晉書及唐人枚本正義皆爲枚書僞造桑欽以後傳授之人又斥古文鄭注爲張霸僞書按漢書儒林傳言霸書百兩篇成帝時以中書按之非是紕其書鄭本無百兩篇又言霸分析合二十九篇爲數十正義引鄭曰惟顧命分康王之誥盤庚分三篇又異霸書是爲枚學者不識數也鄭有注者堯典皋陶謨禹貢甘誓湯誓盤庚三篇高宗彤日西伯戡黎微子牧誓洪範金縢大誥康誥酒誥梓材召誥多士無逸君奭多方立政顧命康王之誥費誓呂刑文侯之命秦誓皆伏生故有說立博士謂鄭爲古文者鄭君云我先師棘下生孔安國亦爲其說故古文得自爲一學有師

說又泰誓三篇民間所得武帝使博士起傳故獨有傳與書序總三十五篇三十一卷泰誓疏云李頤集注尙書于僞泰誓每篇引孔安國曰計安國必不爲彼書作傳不知安國作傳止泰誓三篇他古文無傳枚氏僞爲不知孔穎達且悍然爭之其事至今始明也其未立博士之篇馬融所謂絕無師說者謂之逸十六篇舜典汨作九共九篇大禹謨棄稷五子之歌胤征典寶湯誥咸有一德伊訓肆命原命武成旅獒罔命二十四篇十六卷皆同題同卷古文本四十六卷武成一卷建武之際亡鄭以博士泰誓一卷益之復得四十六卷皆序自爲卷漢書楚元王傳云逸書十六篇藝文志云以考二

十九篇得多十六篇荀悅漢紀武帝紀云得古文尙書多十六篇孔安國家進之云多者明伏生書雖少於孔壁書而史記儒林傳所謂求其書亡數十篇獨得二十九篇者實與孔壁書同後先相應也枚氏書則以孔壁文有師說之三十二篇分去書序又分堯典出舜典分皋陶謨出益稷以三十一爲三十三去孔壁文無師說者又去泰誓而造大禹謨五子之歌胤征仲虺之誥湯誥伊訓太甲三篇咸有一德說命三篇泰誓三篇武成旅獒微子之命蔡仲之命周官君陳畢命君牙囏命通孔古文及書序爲五十九篇五十一題同序同卷分序去一大禹謨皋陶謨益稷同序去二康誥酒誥梓材

同序去二通去五卷以合藝文志四十六卷之數不知同序同卷大禹謨雜入伏書卷中難置多少之數枚視伏書題多二十一文多十九篇多二十五卷多十八卷又半何云多十六篇傳自桑欽乎至民間泰誓已立博士漢人或疑之劉歆欲立古文亦不舉泰誓知古文中不得有泰誓枚乃造泰誓三篇尤其愚拙之迹其序稱巫蠱事漢書楚元王及儒林傳皆有之然安國嘗爲其說未聞泰誓外承詔作傳則孔傳之僞亦可知也毛奇齡以楊倫傳誤文謂賈馬鄭爲泰書非孔學建武時天下初定杜林於西州獨懷泰書古文一卷耳非有四十六卷又賈逵爲作訓是有訓注之卷不得以論無注

之十五卷奇齡徒以明人應試妄攻古文吳澄歸有光僞造
尚書二十九篇古經十六卷之文徧檢漢志無之又陰妒閻
氏若璩疏證之作間桐鄉錢甲漳浦蔡甲謾語激而右枚反
以鄭之四十六卷當柰書一卷則爲校學者終不識數且謂
杜林東漢初人後漢書列之東漢末諸儒之後明別之爲非
孔學會不覽漢書亦列安國於西漢末諸儒之後以非博士
業然則後漢書列杜林於諸儒後正明其爲孔學且桓榮賈
逵杜林鄭馬皆自有傳故附見之儒林傳末毛於此學而不
思書詞書字適以發枚覆所引篇目盡背於古枚文之罪在
塞絕孔書而自晉以來朝典文章半出枚義則此二十五篇

爲考訂詞頭之用亦儒者不可少之書是毛書不爲無俚雖然枚文固宋以來言精言微言心性者之資糧也而朱子獨以爲疑嗚呼卓矣嘉慶甲子正月十三日

法言文中子

法言之書強好之者多不明其文理序言圖徽者徽徽通言自謀樹幟也而宋咸注云圖善師爲桐子命者桐侗僮童通而注云桐洞也問銘荅以慎言禮書者謂銘法見禮記而注廣言膚淺酒誥篇空今亾者謂今不能補而注云今文亾古文有舉蜀莊以旃者謂旌名也而注以旃爲之知幾先甲一日易者揆度易也後甲一日難者謂乙抽輒而出難也而注

反云先未兆後已形重黎篇欲讎僞者讎僞同而注云匹也
孝至篇處僞者處度也而注云居僞皆不明文理又先知篇
明言井田肉刑而孝至篇復井刑注云井田象刑是違法言
本意又重黎蓋天應難未幾者楊雄自言其難蓋八事而注
不知淵騫篇周順赧者順謂愼靚王而注亦不知知讀法言
者多愚矣文中子王通必有其人作書者蓋王凝父子夸誕
可憐人也其云子之家廟座必東南向不忘先人之國似非
情理又云子之家朝服祭器不假又云子躬耕庶人之職也
何當有朝服蓋虛造語言隨意所之耳

異端

魏王肅字子雍何晏字平叔王弼字輔嗣晉皇甫謐字士安
唐啖助字叔佐趙匡字伯循陸質本名淳字伯冲宋孫復字
明復王安石字介甫此九人者蔑棄典文幽沈仁義游辭浮
說波蕩後生使易書禮春秋論語舊說盡亂而王肅取爲精
悍兼采馬融賈逵之與鄭異者羅織之時蜀李譔亦皆依準
賈馬與王氏殊隔初不見其所述而意歸多同其餘人益不
足責矣

揃

士喪禮云蚤揃如他日注云斷爪揃髮也人君則小臣爲之
他日平生時士虞記作搔翦喪大記作小臣爪手翦鬚莊子

外物篇言訾掇可以作老葢平翦眉鬚不使老醜鄭以掇爲
摘鬚義本喪大記所謂事死如事生也有明新吾先生呂坤
者非之曰斷爪翦髮何謂也體受歸全存之何病郝敬又爲
之說曰剔手足甲曰爪刷鬚鬢曰摘鄭語掇爲斷鬚非也葢
呂止讀禮記大全忽發癩論郝則及見鄭注而不深求其義
究之郝非鄭注而呂非周公呂更非矣

南風

史記樂書云昔者舜作五絃之琴以歌南風集解引鄭又引
王肅云南風育養民之風也詩曰南風之薰兮可以解吾民
之愠兮索隱云此詩之詞出尸子及家語案樂記注云南風

癸巳存稿

卷十四

十

靈石楊氏棻

長養之風言父母之長養也其辭未聞正義云聖證論引尸
子家語難鄭馬昭云家語肅所增尸子雜說不可取證正經
也尋南風之義鄭有師說虞聖元音其辭未聞自是自古無
傳正義之辨乃懦詞也家語書不足道穀梁傳引尸子韓非
子引慎子尸子尸子取古取可據鄭何不取證正經公羊傳
有高子魯子子沈子子司馬子子女子子北宮子公扈子詩
序有高子傳有仲梁子孟仲子論語注有墨子爾雅注有尸
子何非取證雜說蓋此尸子魏時續卷之文事見隋經籍志
宜鄭未聞馬昭不知尸子亦肅增王肅皇甫謐得非所謂怪
誕者乎

井不反唾

不跨井竈儒者行也玉臺新詠魏劉勳妻王宋詩云千里不唾井況乃昔所奉蘇鶚演義引作千里不瀉井況乃昔所奉當是古常談唐李匡乂資暇集云諺曰千里井不反唾演義引杜詩注諺云千里井不反唾是唐時亦有此諺反者謂反陳莖唾者謂唾汙之唐人多好穿鑿演義引金陵記云江南計吏止於傳舍及時就路以馬殘草瀉於井中而謂已無再過之期不久復由此飲遂爲昔時莖刺喉而死後人戒之曰千里井不瀉莖資暇集云不反唾唾或爲剉昔人經驛舍反馬餘莖於井後經此井汲水爲莖所哽因言千里井不反剉

後譌爲唾爾反唾是二義不反及不瀉爲一事不唾又一事
不得云唾爲剉譌且南朝泄莖魏時何得豫譌爲唾也

陳祥道禮書

孔穎達說月令中星引書考靈曜云主春鳥昏中種稷主夏
心昏中種黍主秋虛昏中種麥主冬昴昏中入山斬伐具器
械此唐虞時中星月令正義引之蓋文從其類而陳祥道非
之云不特如此龍見而雩火流而授衣天根見而成梁凡奉
天順人莫不順乎此偏舉不中之星以與孔爭豈非怪乎又
嘗見一短書名曰稽古日鈔引有所謂蔡虛齋也者言尙書
六宗古說皆謬當爲日一月二經星三緯星四五辰五十二

辰六夫緯星卽五辰經星卽十二辰曾不知此其知蓋與祥道同矣

書蘆城平話後

蘆城平話四卷皇明小史十八卷宮史五卷事物初畧三十
四卷又有買愁集不全皆呂貞九撰句容王君喬年所藏呂
蓋天津人其自號赤隱不知何意平話中說熊廷弼汪文言
傅樾吳孔嘉吳養春事甚詳前於王氏見明時不全京報天
啟四年四月傅樾參內閣中書汪文言卽休寧縣犯賊遣戍
之庫吏汪守泰六月審確杖革爲民檢熹宗本紀不載至報
稱十二月梁夢環復參汪文言一本奉旨鎮撫司委人拏拿
癸巳存稿

卷十四

十三

連筠移叢書
靈石楊氏集

則本紀所云辛巳逮問報稱五年三月錦衣衛取供詞連趙南星等本紀爲日丁丑報又於四月內夾鼎甲單第三名吳孔嘉下云貫南直隸徽州府歙縣人本紀則云三月丙寅報稱八月奉聖旨東林關內江西徽州一切書院俱著拆毀其田土房屋估值變賣催解助三殿工程則本紀之八月壬午也此後報稱抄發王紹徽東林點將錄一卷中開捧把帥字旗將校一名地賊星鼓上蚤內閣中書汪文言六年三月文言族人京官汪汝楫汪澍俱削職爲民閏六月東廠奏據告人吳榮告直隸徽州府歙縣人吳養春家貲數百萬爲富不仁一向結交搢紳霸佔黃山砍伐樹木貨賣年久獲利何止

數十餘萬先年巡按御史駱駁曾見其強橫將黃山地趾判斷一半入公卷案現存養春用賄蒙蔽仍霸官山近因大工肇興採取黃山木植應用養春膽敢遣家丁文節到京打點停寢採木旨意又前於天啟五年八月內奉旨圻毀書院養春不遵明旨巧立名色創崇文書院招聚朋黨等情廠臣隨將其黨吳君實吳審叔程夢庚章應薦茅培許應江川佑拘喚訊問符合奉聖旨這欺君抗旨犯人著該廠監候其吳養春著錦衣衛官旗同撫按拿解其賣木贓銀嚴拿家屬監追八月東廠奉聖旨犯人吳養春等質對明白著拿赴鎮撫司嚴刑追贓北鎮撫司奉聖旨程夢庚等贓銀十三萬六千兩

本司立限嚴追吳養春贓銀六十餘萬兩著撫按追解山場
木植值銀三十餘萬兩著工部卽差官估賣九月工部奉聖
旨黃山木植專差主事呂下問上緊追解其山場丈量等則
著定額另奏是月議敘吳孔嘉以三朝要典纂修成十月本
紀有丙申逮中書舍人吳懷賢下鎮撫司獄杖殺之不見京
報懷賢乃休寧吳罵傳樾梁夢環吳孔嘉者也報又稱七年
二月大理寺丞許志吉奏吳養春家財廣布於外請從天津
淮揚兩浙諸處嚴追奉聖旨卽差許志吉辦理四月直隸奏
黃山木植一案三月間歙縣嚴寺民人萬餘糾合同赴府城
拆毀察院尋殺主事呂下問下問破後牆攜家眷躲入同知

署內現在知府石萬程詳報病軀不能供職奉聖旨這木植一事卽歸併許志吉辦理本紀俱未載報又稱崇禎元年五月抄發逆案節畧許志吉矯旨派賊附逆流毒黃山一案重辟何辭入第三等斬監候秋後處決吳孔嘉交結近侍黃山一案慘殺多人入第六等徒三年納贖爲民其見於官文書者如此而府志縣志無有也讀平話序錄乃知其事其涉吳孔嘉者定逆案時嚴訊吳榮榮故養春家奴竊財逃去旣而依孔嘉孔嘉幼失父其幼讀書及養母費用考試之費與見奄拜義父之贄五萬金皆出於養春養春遣奴吳文節核天津鹽務至京看孔嘉遇榮欲告之榮夜語孔嘉謂養春本殺

孔嘉之父而偶恤其身且黃山木植可助三殿工孔嘉以語
奄父奄父笑曰吾得財汝復憾吾義兒固孝子也汝使吳榮
來吾爲殺文節故孔嘉入逆案其在六等當時亦以義兒孝
子寬之也其實孔嘉父以弱病死其爲魏奄義兒實以功名
念重請示養春養春富而愚畀以重賄而不意得禍之酷也
魏忠賢傳亦言孔嘉養春有仇誘奴告之父子瘐死又以寺
丞許志吉爲評事石萬程則削髮去鬘黨李魯生傳則魯生
時爲給事中猶上章劾萬程其鄙頑如此平話中王爾玉者
江夏知縣熊廷弼獄承追熊兆珪賊逼之死湖廣人誦言爾
玉帷薄不修蓋非誣也此書與點將錄東林籍貫東林同志

錄東林朋黨錄盜柄東林夥天監錄魏應泰夥壤封疆錄並傳其眞空家鄉無生父母傳櫬告梁夢環語見汲縣潞王墳旁廟碑不知何所本雍正六年九月河東總督辦東平州牛三花拉案其教名三元會空字教咒云眞空家鄉無生父母現在如來彌勒我主乾隆三十七年山東巡撫辦單縣劉省過案其教名五輩道收元教咒云眞空家鄉無生父母現在如來彌勒我主蓋邪人邪見同喜稱說汪文言乃能罵之宜觸傅梁之怒平話體蓋多臆造此書於事實似十居其八嘉慶癸亥重遇句容住葛仙庵中借平話及舊報爲比附之幾以爲字字可据過宣和遺事遠矣

義門讀書記

何焯以時文名滿天下用批時文法批書讀書記中批論語
舜有臣五人一章云大全采陳定宇說唐虞周平放然後徐
徐找出惟字乃字口氣爲下文二句收足難字轉捩地始八
面俱到蒙引存疑以爲主周言斯者周也妄生穿鑿試取經
文一再讀果如伊所言否也閱至此令人失笑此章不主周
言斯字不指周則文義不可解何於康熙二十七年十月許
三禮奏云何焯作貢生往來徐乾學門下代作會墨序寓言
諷刺乾學託江南巡撫訪拏之康熙四十五年四月奉
上諭文義荒疏不準授職五十四年十一月奉

上諭生性不識恩義革去官銜進士舉人雍正四年三月奉
上諭頗有文名可惜行止不端立身卑污

聖明垂鑒正以其顛倒是非也何又嘗批有困學紀聞於天
道千四百六十一分里之三百四十八句批云句讀未詳按
前文有三分里之一四分度之一句讀相同若未詳則先已
未詳而獨於此句批之知其生平多欺心之學矣

白席

通鑑綱目有書法發明等書續綱目又有發明廣義等雜於
事實之中卑情諂態甚可厭惡容齋五筆云楊愿佞秦檜檜
食閒噴嚏失笑愿倉卒閒亦隨之噴嚏失笑此等書頗似之

癸巳存稿

卷十四

六

通鑑纂要
靈石楊氏栞

又嘗戲謂之白席老學菴筆記云北方有白席鄙俚可笑韓魏公赴一姻家禮席偶取盤中荔支欲啗之白席遽唱言資政喫荔支請眾客同喫荔支魏公憎其喋喋因置不復取白席又唱言資政惡發也卻請眾客放下荔支魏公亦爲之一笑

晉陽庵

嘗於潘家河沿晉陽庵看客遇一人極嘗庵名言京城庵何得名晉陽庵憶古事有一切比劉肅大唐世說新話云薛良嗣爲荊州長史荊州舊有河東寺後梁蕭詧爲其兄河東王造良嗣見而驚曰此江漢之間與河東有何關涉遂奏改之

良嗣寡學深爲人所笑欲引以爲對再思之而止法苑珠林則言河東寺在松滋又有河西寺晉郭璞所造裴薛柳杜四姓居其地

僞笑

明人喜言笑者由趨風氣僞言之文集中曰余笑而不言者必有二三處非是則不爲尖新崇禎中奏疏至有曰豈不笑破天下之口者非是則不爲氣節碧血錄天變雜紀云天啟丙寅五月初六日地震一人折腿臥地呻吟見婦人赤身以物掩下體過此人又痛又笑計六奇明季北畧言此人姓項其笑非當時事理也宋岳珂程史云歐公知貢舉有舉子問

癸巳存稿

卷十四

十七

靈石楊氏栞

堯舜事是一是二觀者闐然大笑公不動色徐曰疑事恐悞者卽不必用觀者又一笑公他日爲學者言必感類及之然感類非歐所及歐五代史鄭珏傳云唐兵至梁帝哭問計珏曰以傳國寶入唐軍緩其進以待救兵之至梁主曰能了事否珏徐曰恐不易了於是左右皆大笑其笑亦非當日事理事後文章也

右甲子七月在德州札記者言感類非歐事者亦有所見非惟鄭珏傳可證也宋人高晦叟珍席放談云南唐時侍郎楊鑾問妻兄國相湯悅曰不知堯舜是幾件事悅曰如此疑事不要使則非問知貢舉者又舉場亦前有二說珍

席放談云眞宗問楊文公簾中何故哄笑對言有舉人上
請堯舜是幾事臣荅以有疑時不要使同僚皆笑眞宗亦
爲之動容又龐元英文昌雜錄云劉莘老言昔鄆州進士
李矩赴試問李演曰堯舜何如可以對天地否演曰似此
疑惑事切不可用聞者大噱此事雜出未必舉子專不知
堯舜故知歐無此事也庚午九月宣城舟中書

衝波傳

釋史載衝波傳云孔子適陳途見二女采桑子曰南枝窈窕
北枝長荅曰夫子遊陳必絕糧九曲明珠穿不得著來問我
采桑娘子至陳陳發兵圍之使穿九曲珠乃釋其厄夫子使

同賜返問之其家謬云女外出以一瓜餉二子子貢曰瓜子在內也女乃出見曰蜜塗絲以繫蟻煙薰之蟻乃過金樓子雜記篇云孔子遊於山使子路取水逢虎擊其尾得之納懷中還問曰上士殺虎何如子曰持虎頭中士殺虎何如曰捉虎耳下士殺虎何如曰擊虎尾子路出尾棄之釋史亦引爲衝波傳今常熟南十里有石碣曰先賢言子故里土人言孔子來視子游至此有一人浴河中問之荅曰頭戴衣衫身戲水若問虞山有十里孔子遂反權去也其語甚似著來問我采桑娘其言孔子至吳古亦有之越絕書云孔子從弟子奉先王雅琴禮樂奏於越述五帝三王之道越王問以兵孔子

不荅因辭而去釋史又引吳越春秋云孔子至吳夫差聞孔子至微服往觀之或傷王指王怒欲索而誅之子胥諫則說苑正諫所謂白龍魚服之說也今趙氏吳越春秋無此事或楊方所未削繁別本

科場書

今人謂科場書爲兔園冊非也舊五代史馮道傳云道謂任贊曰兔園冊皆名儒所集道能諷之今士子止看文場秀句便爲舉業兔園冊者唐貞觀時虞世南爲蔣王撰集其人不事科場文場秀句王啟所集懷挾本也唐書藝文志總集類有文場秀句一卷類書有韋稔應用類對十卷高測韻對十

卷而不載免園冊蓋鄙其通俗然其風不始於唐後漢書蔡邕傳封事七事五云諸生連偶俗語有類俳優或竊程文虛冒名氏唐書選舉志云帖經孤章絕言舉人驅懸孤絕索幽隱爲詩賦誦習之不過十數篇難者悉詳矣是漢時有連偶捷錄唐則孤絕詩賦與文場秀句進士明經分有其書宋時又有別本愧郊錄云政和四年六月十九日黃潛善奏比年以來求舉者於時文中采摭陳言區別事類編次成集便於剽竊謂之決科機要詔立賞錢百貫告捉仍拘板毀棄元王惲玉堂嘉話引辛殿撰小傳云旣歸宋非科舉莫進公笑曰此何有消青銅三百易一部時文足矣旣擢第孝宗曰是以

三百青蚨博吾爵者才其爲是科場書謂之時文何遠春渚紀聞云李偕赴試夢陳元仲手執一黃背書若書肆所市時文者顧視不輟畧不與客言其時人士揣摩如此予又於舊攤買得泐科古今源流至論別集二冊計十卷宋黃履翁所集者又在泐科機要之後明史陳幼學傳云稍遷刑部主事時嘉興人袁黃妄批削四書書經集註名曰刪正刊行幼學駁正其書抗疏論列按此風甚熾乾隆二十九年部議坊間刪本禮記出示銷燬五十四年禁小本經書五十七年五十八年禁刪節經書嘉慶二十年三月禁坊刻四書典制類聯及四書人物類典串珠等書道光十一年十月禁書肆小本

嚴究板片銷燬十四年七月提督衙門獲文海題備等小本
四千八百五十本交刑部

酷儒莠書

夾谷之會左傳云齊犁彌使萊人以兵劫魯侯孔子以公退
曰士兵之穀梁傳云齊人鼓譟而起孔子使司馬止之蓋齊
以兵來魯以兵應之史記齊魯世家所載是也穀梁又增一
事云齊人使優施舞於魯君之幕下孔子曰笑君者罪當死
使司馬行法焉首足異門而出史記孔子世家云倡優侏儒
爲戲而前孔曰匹夫熒惑諸侯者罪當誅有司加法焉首足
異處齊侯懼而動陸賈新語云優施舞於魯公之幕下孔子

曰君辱臣當死使司馬行法斬焉首足異門而出齊人瞿然而恐後漢張升傳守外黃令趨明威戮曰昔孔子暫相誅齊之侏儒手足異門而出故能威震強國反其侵地後升以誅死此四引孔子之事乃委巷窮儒忮螫之心無所泄造此莠言上誣聖人不可訓也優人笑惑乃其職於禮宜卻之於法不得死且魯豈當殺齊優實其說是行不義而殺不辜齊人怒而魯君不返也矣人有倣行之者史記李廣列傳云廣夜行霸陵尉醉呵止廣宿亭下廣爲將請尉行至軍斬之魏志楊阜傳云阜爲將作大匠欲上疏省宮人諸不見幸者乃召御府吏問後宮人數吏守舊令曰禁密不得宣露阜怒杖吏

一百數之曰國家不與九卿爲密乃與小吏爲密乎夫霸陵尉職應止夜行者魏令將作大匠不當知後宮人數尉與吏賣法則君子殺之守法則廣斬之皐杖之豈非器小心螫舞文肆毒者乎世說云褚裒微行住錢塘亭令至亭吏驅裒移牛屋下後令知之爲具饌於公前鞭撻亭吏欲以謝慙公與令酌宴言色無異狀如不覺唐語林云陸充公爲同州刺史僮遇參軍不下馬參軍鞭之謁公謝去公曰不下馬打也得不打也得官人打了去也得不去也得褚陸皆所謂雅量者褚不原吏奉令之苦陸庇其僮刻者記之以爲美談是真莠矣藝文類聚載桓譚新論云余歸沛道疾蒙絮被絳罽襜褕

乘驛馬宿東亭亭長疑是賊發兵夜來余令吏勿闕乃相問
而去後漢書韓康傳云亭長以韓徵君當過方發人牛修道
橋康過亭奪康牛使者欲殺之康曰此自康與之亭長何罪
乃止亭長不覺盜罪也倘譚吏與闕無論勝敗亭長小吏必
終受誣奪康牛正所以爲康也乃欲殺之倘不奪康牛當奪
誰牛道橋不修又當死以此知小吏不可爲而桓譚韓康不
失爲君子也其尤異者晉語云趙盾以韓厥爲司馬使人以
乘車千行厥僂之盾召厥禮之曰吾故以是觀汝也夫厥之
能守法也固矣盾所使之人何罪以此推之魏志曹植傳注
引世語云太祖遣太子及植各出鄴城一門密教門者不得

出以觀其所爲太子至門不得出而還楊修先戒植若門不出侯受王命可斬守者植從之不請符而斬守者與叛逆何異修他日被誅植終不能奪嫡知太祖英察矣又以此推之高歡語長史薛琬言使其子洋治亂絲洋拔刀斬之曰亂者必斬夫違命不治絲獨非亂乎其意蓋倣齊君王后以椎解環不知環破卽解亂絲斬之仍不治也漢書龔遂傳云臣聞治亂民猶治亂絲不可急也緩之然後可治高氏父子不足論然歡在洋之愚慙不至此其狀迂而很乃無知酷儒之莠言此東坡志林所謂杜默之豪正京東學究飲私酒食瘴死牛肉醉飽後所發者也

愚儒莠書

朱弁曲洧舊聞云建隆間竹木務監官患所積材植長短不齊乞翦截俾齊整太祖批其狀曰汝手指能無長短乎胡不截之使齊長者任其自長短者任其自短弁親戚有見此狀及批者其言似可信邵博聞見錄則云破大爲小何若斬汝之頭乎言已近矣王鞏清虛雜著則云三司奏截大枋太祖皇帝批其狀曰截你爺頭截你娘頭其愛物如此周密齊東野語則謂手指言文弱無氣象太祖以三司請截摸枋大材脩寢殿批曰截似你爺頭截你娘頭別尋將來真大哉王言也此何王言氣象蓋以史記漢高慢罵而倣以爲書其愚如

此蔡條鐵圍山叢談云溫成叔堯佐除節度宣徽景靈三使包孝肅爲中丞擊焉其白簡駭人不忍聞而昭陵容之曲洧舊聞則云張堯封除宣徽使包拯乞對大陳其不可反復數百言音吐憤激唾濺帝面帝卒爲罷之張堯封溫成后父也仁宗退謂后曰中丞向前說話直唾我面汝只要宣徽使宣徽使豈知包拯是中丞乎尋宋仁宗及溫成並無得罪於羣臣百姓溫成事見本傳見孫甫包拯唐介張擇行王舉正傳英宗立後諸名正人者皆以仁宗無子不使之御內爲臣僚擁戴英宗功因追罵其時宮掖以自表其忠堯封爲宣徽使並無不可何至憤激唾上面且堯封爲石州推官卒後溫成

幼無依始入宮何由旣貴後爲父求官又溫成旣卒五年包拯始爲中丞仁宗何緣以告溫成欲使溫成緣何知之今加以妄詞述中丞狂悖皇祐童駮宋之臣子忍爲此言者蓋以晏子春秋齊景形狀而倣以爲書其愚如此李元綱厚德錄引丁謂談錄云竇儀見客四弟已貴皆侍立王闢澠水燕談錄云王祚見客子宰相溥侍立陳省華見客子堯咨堯佐等侍立皆云學生禮當然其言可詫又云堯咨守荆南宴集以弓矢爲樂母夫人曰汝父教汝以忠孝輔國家今汝不務行仁化而專一夫之伎豈汝先人志耶杖之碎其金魚射爲六藝之一州將習射乃正業忠孝之行也受杖當解金魚杖碎

金魚金堅且碎人骨折矣衰門賤婦亦不至此堯咨母不當有此言此事明方昕集事詩鑒引此爲賢母著書者含毫吮墨搖頭轉目愚鄙之狀見於紙上也

談元莠書

宋蘇軾言每日胸中出少許議論積久便成一書此宋時習派不問是非甚害事也五總志云王介甫以動靜問東坡東坡曰精出於動神守爲靜動靜卽精神也按精靜同聲神从申動也蘇說乃相反澠水燕談錄云晁迥言人耳有靈響聽於靜中似鈴聲遠聞者耆年之後愈覺清澈如幽泉漱玉如清磬搖空如秋蟬曳緒以爲三妙音石林燕語云晁迥晚年

耳中如潮如磬聞聲如簧如雷如鈴如潮如磬如蟬如泉爲
學佛仙之驗按此衰年腎枯之病也耳脈在腎骨之本在腎
腎枯則骨之相接處不潤故精澀神疲喜按摩欠伸頭骨不
動腎枯則頭昏失志骨之腠理磨響耳根自聞之乃以爲妙
此種議論雖少許然不如不出也

誇誕莠書

四庫書提要以蔡條鐵圍山叢談爲文章中小人之雄蓋以
其文姦怙惡梁谿漫志亦以爲無忌憚之小人然此誇誕短
見之書也誇誕乃小人之常惟條言實有不可解者稱宋故
事天子誕節宰相獨登殿上天子萬壽天子還內宰相夫人

獨登殿奉觴上天子萬壽仍以紅羅銷金鬚帕繫天子臂此
儒臣之至榮云云宋立國亦有法度不當有此故事而條言
蔡京妻嘗爲之按宋史姦臣傳云帝幸蔡京第命坐傳觴京
謝表云主婦上壽請醕而冑從京子攸爲開府少保得與宮
中秘戲侍曲宴多道市井姪嫖謔浪語妻宋氏出入禁掖乃
知母子姑婦同此汙穢而條又誣之爲宋朝故事謂宰相夫
人皆如此則是誣哲宗以上而於此自暴其母之醜君臣父
子夫婦之倫皆無之卽在誇誕之中亦是莠言正人君子不
忍信也

晉人元虛之學大臣世族賣國肥身流毒甚久事由父子兄弟漠不相關而君臣朋友因之潰敗子以字呼父弟以火攻兄已不足責謝氏家範差勝於王然晉書謝元傳云謝安日子弟亦何與人事而正欲其佳元曰譬如芝蘭玉樹欲使其生於庭階耳宋書謝宏微傳云宏微讓財不爭曰分多共少不至有乏身死之後豈復見關此皆千年所傳名言謂子弟不與已事死後不復見關其言慘忍刻愒欲於君臣朋友之際望其終始豈可得乎蓋其心可疑矣此又老莊釋氏之莠也

悖儒莠書

呂氏春秋言湯克夏大旱七年乃以身禱於桑林自以爲犧
牲用祈於上帝民乃大悅雨乃大至淮南子言湯時大旱七
年卜以人祀湯言我自當之乃使人積薪翦髮及爪自潔居
柴上將自焚以祭天火將然卽降大雨此凶年鼓亂之悖言
也魏志文帝紀記載漢魏禪代眾事太史丞許芝言周公反
政尸子謂孔子非之以爲周公不聖不爲兆民也又輔國將
軍等奏孔子曰周公其爲不聖乎以天下讓是天地日月輕
去萬物也此尸子蓋王朗家物後王肅出其本有續卷見隋
經籍志又梁書高祖紀中興二年正月府僚勸進云使夫匹
婦小兒羞言伊呂鄉校里塾恥談五霸亦可謂悖矣

賊書

明常熟徐復祚花當閣叢談村老委談云里中有邱老四者
賊魁也著一書名肱篋秘訣有庠生者從之盜按莊子外篇
云儒發冢大儒臚傳小儒稱詩曰青青之麥生於陵陂生不
布施死何含珠爲梁書良吏傳云邱仲孚齊永明初選爲國
子生舉高第未調還鄉里家貧無以自資乃結羣盜爲之計
晝劫掠三吳仲孚聰明有智畧羣盜畏而服之所行皆果故
不發南史亦同此皆秀才作賊才能著書者也若晉時則戴
淵嘗在江淮間劫掠商旅石崇作荊州刺史劫奪殺人致巨
富祖逖作官時夜使健兒出南塘鼓行劫掠俱見晉書傳古

癸巳存稿

卷十四

三

通鑑纂要書
靈石楊氏栞

人不以爲奇北齊司徒左長史畢義雲家兗州北境嘗劫盜
行旅晚方折節從官見北齊書傳唐以後武達者有之文通
則少矣然宣室志云深州錄事參軍李生讀書以詩稱少嘗
掠人於太行排人崖下得綺繪百餘段酉陽雜俎云鄭刺史
彙當家鄭寅讀書爲盜事發而死雲溪友議云李彙征於循
州韋氏莊見韋思敬年八十餘吟古今詩數十家又吟李涉
詩乃言少嘗爲盜江鄰幾雜志云大名進士劉建侯與妻同
殺人取其金程琳爲知府殺之其人容貌堂堂言詞辨博墨
客揮犀云有秀才盜絹官試之賦乃云窺其戶而闌其無人
還不謂矣見其利而忘其有義卷而懷之盜絹與古盜犬秀

才不同此固盜也王文簡池北偶談云先世翁媼遇夜有穴其壁者燭之曰君儒生乃作此夫婦出粟與之去錢至敬庵筆記云平公其政爲鎮洋令有捕繫賊並贓至秀才也公曰無此理也責捕而釋賊一日邑七都施姓牆被穿驚起於室隅獲賊解縣則前秀才也乃撻賊此皆常熟所謂庠生者流村老委談又云庠生者姦事主女邱老四大驚以爲必敗案果破庠生者在繫自言之蓋肱篋祕訣中所切戒真奇異書也宋人書有鬼董者其卷五云北蘆塘蓋卽今壽州古三官人訓與安豐彭八繆興國王孝忠偕周寶劫臨安赤山閨一郎家訓與眾誓毋殺人毋汙婦女旣執閨妻中官養女也有

色寶欲淫之訓怒拔刀將斬寶乃中止閱月寶八興國孝忠皆就縛獨古訓逸去終莫能得紀文達如是我聞云李金樑李金柱劫一節婦鬼神怒視後並伏法又述李鴻志言鳴散驪馬三十年夥黨中敗者十二三不敗者十七八若一汙人婦女屈指計之從無一人不敗者故恒以是戒其徒灤陽消夏錄云齊大與眾行劫眾劫淫一婦齊大挺刀解之後羣盜就捕駢誅惟齊大終不能弋獲合古訓庠生者李志鴻齊大之事知肱篋秘訣之言不謬或言盜多縱酒媚妓家此姦盜各案非姦盜並行也少時見句容名捕居明者天王寺大盜採花官追之急居請寬免比言此案必破以身任之案果破

令爲歸安費君元震厚賞而問之居明日盜而姦爲無理故必破費笑曰盜豈有理耶居明日固也偷劫皆出無奈採花非無奈鬼神惡之故強盜拒捕情急殺人有漏網採花獨無漏網者人神交乘之也論亦廉悍矣哉

書太清神鑑後

太清神鑑山根橫列第五位魚尾缺陷是賊人也色惡則被引也年上橫列第七位盜賊發惡色者卽是賊痣生眼眦上者主作賊生盜部主姦竊眼眦上應是映上列子說符篇晉有卻雍者能視盜之貌察其眉睫之間而得其情晉侯使視盜千百無遺一焉羣盜殘之眉睫之間殆太清神鑑所謂映

而誤爲肱也

鄧析子跋

鄧析子書不多語平易近人有理致無譁訐之習意古所謂
鄧析書不止此如淮南萬畢術別有篇策也世言子產殺鄧
析非也鄧析蓋與子產同里居列子仲尼篇云圃澤役者伯
豐子過東里遇鄧析鄧析言執政功伯豐子曰無知無能而
知與能爲之使執政乃吾之所使鄧析無以應楊朱篇云子
產以兄朝弟穆爲慮密造鄧析而謀之鄧析使誘以禮義之
尊朝穆謂鄙而可憐鄧析曰子產與真人朝穆居而不知也
子產與鄧析甚厚且左氏春秋有年月爲檢必不誤左氏云

定公九年春鄭駟歆殺鄧析而用其竹刑是駟歆事荀子非
十二子云不法先王不是禮義好治怪說玩奇辨持之有故
言之成理是鄧析也則鄧析自有罪列子力命篇又云鄧析
操兩可之說設無窮之辨作竹刑數難子產之治子產誅之
呂氏春秋離謂則云鄭國多相懸以書者子產令無懸書鄧
析致之令無致書鄧析倚之令無窮應之亦無窮可不可無
辨罰愈疾其亂愈疾洎水甚大富人溺有得其死者富人請
贖之其人求金甚多以告鄧析鄧析曰安之人必莫之賣矣
得死者患之以告鄧析鄧又荅之曰安之此必無所更買矣
子產治鄭鄧析務難之與民之有獄者約大獄一衣小獄襦

袴民納衣襦袴而學訟者不可勝數是非無度而不可日
變欲勝因勝欲罪因罪鄭國大亂子產殺鄧析而戮之民心
乃服其事甚鄙鄧析爲大夫有田祿不得愛衣袴小利當是
鄭國有此人子產殺之鄧析收得其書列其事指與刑鼎相
難者別條出爲竹刑卽荀子所謂好治怪說者子產卒後二
十年駟歆以他罪殺鄧析初子產所殺者人不得其名以其
術盡鄧析所輯書中遂以書名其人耳訟書古不傳或言當
在名家或言當在縱橫家然大半鄙淺不能歷久唐人雷民
傳云雷州雨後野地得鰐石謂之雷公墨凡訟者投牒必以
雷公墨雜常墨書之爲利則又厭勝之術訟師多奉之周興

令侯思止等招集數百人作告密羅織經宜多卷軸然大唐新語止云一卷唐書來俊臣傳云與其屬朱南山萬國俊作羅織經一篇具支脈綱由咸有首末按以從事則止一篇也今亦不傳宋沈括筆談云世傳江西人好訟有一書名鄧思賢皆訟牒法也其始則教以舞文舞文不可得則欺誣以取之欺誣不可得則求其罪以劫之蓋思賢所記師傳交構詭義其時有刻板乃通行故古訟書不傳訟書以鄧思賢爲最古或其人姓鄧書本無名傳者以人名其書或卽書名示思鄧析之意皆未可知元周密癸辛雜識云江西往往開訟學教人如策科之法出甲乙對荅及譁訐之語專門於此從之

者常數百人所讀蓋鄧思賢也乾隆七年四月初二日部議坊刊賣訟師祕本驚天雷相角法家新書刑臺秦鏡等書及擬定膚受式樣造成險惡套語者嚴加查禁賣者杖一百徒三年買者杖一百近又有蕭曹心書徹膽寒鐵木犁霜毫寫心等書語極猥很覽其文意乃必敗之道不知何以能行也不昵婦人

漢書朱博傳云博夜寢早起妻罕見其面吳志劉繇傳注引吳書云顧悌待妻有禮常夜入晨出希見其面此史傳相襲不致思之詞其妻卽驕情亦不當以婦人日日早寢而晏起至不見其面也南史徐勉傳云勉參掌軍書劬勞夙夜動經

數旬乃一還家羣犬驚吠北齊書邢劭傳云劭與婦甚疏未嘗內宿自言嘗晝入內閣爲狗所吠言畢便撫掌大笑周書蕭詧傳云詧性不喜見婦人相去數步遙聞其臭經御婦人之衣不復更著甕牖閒評云蘇軾與友朋羣居性不昵婦人此或由勤於人事或歷憂患亦或由天性南史何點傳云感家禍欲絕婚宦尙之強爲娶瑯琊王氏禮期將親迎點累涕泣求執本志遂得罷老又娶魯國孔氏女點雖婚亦不與妻相見築別室以處之人莫喻其意魏書夏侯道遷傳云父母爲結婚韋氏道遷云願懷四方之志不願娶婦家人咸謂戲言及至婚日求覓不知所在北史云齊褚伯玉年十八父爲

娶婦婦入前門伯玉從後門出遂山居梁書劉訐傳云兄絜
爲聘妻刻日成婚訐聞而逃匿事息乃還蕭視素傳云妻王
儉女久與別居遂無子王鞏聞見近錄云李化先少好神仙
父母令娶婦禮席之日化先踰垣而走此皆畸人也

止欲閑情

古人止欲閑情正情靜思諸賦譏之者以曲終奏雅其自託
則曰發乎情止乎禮義或言情則野犯無禮義言禮義則矯
僞不近人情是爲有損無益之文蔡邕協初賦云情罔象而
無主曹植洛神賦云心振蕩而不怡欲動情肆窮其幽隱所
謂血氣未定戒之在色也司馬相如美人賦云女乃弛其上

服表其中衣皓體呈露弱骨豐肌時來親臣柔滑如脂臣乃
脈定於內心正於懷其言脈定於內與情罔象心振蕩相對
真麗則名言要在定血氣也

左傳女陽物而晦時

左傳昭元年云女陽物而晦時六字俱詳本傳此語乃綜其
義女者上云近女也陽者上云六氣陽正義引先儒云陽金
燥也物者上云物亦如之注云物事也晦者上云六氣晦正
義引先儒晦爲水謂昏黑也時者上云君子有四時夜以安
身也言近女爲金燥之事在晦亦當順安身之時不可過干
過干則燥爲內熱晦爲惑蠱杜注云女常隨男故曰陽物其

名不正顧炎武云女陰中有陽其物屬火故曰陽似宋元人議論

長白美人

詩顧人云顧人其顧澤陂云有美一人顧大且卷顧大且儼車牽云辰彼顧女女貴大也史記田敬仲世家云選齊國中女子長七尺以上爲後宮蘇秦列傳云後有長姣美人後漢書馮勤傳云祖燕長不滿七尺常自恥短陋恐子孫似之乃爲子伉娶長妻生勤長八尺三寸魏書陸琇傳云毋赫連氏身長七尺九寸蓋婦容以長爲貴漢法八月選女必身長合度長白卽美德賈納短青晉之所以亂也唐書亦言元宗選

長白女子侍太子鹽鐵論刺權云中
山素女亦長白女子也
宋人記龜鶴夫妻短闊亦貴乃偶然耳

元牝

列子天瑞篇云黃帝書曰谷神不死是諸元牝元牝之門是爲天地之根綿綿若存用之不勤其法黃老元素之所同道家河上公老子注云元在上牝在下以元爲鼻牝爲口抱朴子同因此有人中之說是孔氏談苑中山詩話上官泌下官口鄙諺之證矣二仙傳道集云一腎在左爲元以升氣上傳肝一腎在右爲牝以降液下傳膀胱是又醫士右腎命門之謬說也今按牝者古人以爲谿谷所謂虛牝者如今言空洞

朱子語錄云牝只是木孔承柁能受的事物元牝者至妙之牝不是那一樣的牝其言若卽若離嘗深思之元者白虎通五行篇云元冥者入冥也是元爲入牝者唐律衛禁上釋文云有穴而可入者爲牝則元牝之爲古語可知爲表出之儒者可勿復道矣

李娃傳

太平廣記李娃傳文筆極工所云常州刺史滎陽公及其子姓官爵劉後村詩話以爲鄭亞鄭畋然稽之唐書宰相世系表鄭氏滎陽房中無有合者蓋故錯隱之開元天寶遺事記長安妓劉國容使女僕送天長簿郭昭述至咸陽小說所言

地勢多不相應此傳所言坊曲頗合事理長安圖志平康爲朱雀街東第三街之第八坊其第九坊卽宣陽以丹鳳門街言則第五坊平康第六坊宣陽傳云平康里北門東轉小曲卽宣陽是平康宣陽路皆直南北其街則直東西傳又云日暮計程不能達則作傳者信筆漫書之非實情也布政里則在朱雀街西第三街去平康甚近其詭云延秋門外則西城城外託詞取有情理又案北里志云平康入北門東迴三曲卽諸妓所居又其南曲中者門前通十字街蓋宣陽平康南北俱有曲可通不必外街阮籍詠懷詩云捷徑從狹路僂俯趨荒淫古所謂狹斜乃此之謂

魏策龍陽君正注

魏策龍陽君注云幸臣吳師道正注云幸姬也非楚安陵鄢陵壽陵趙建信之比長孫佐輔于武陵詩皆以宮人言之案師道以唐詩說國策其證已弱且唐詩亦有誤本文選齊陸韓卿中山王孺子妾歌云子瑕矯後駕安陵泣前魚泣魚之事非安陵乃龍陽也阮籍詠懷詩宋顏延年注引龍陽安陵事後云安陵君所以悲魚也末語有缺文而相傳已久陸詩蓋本顏注此後詩人相承誤爲安陵佐輔古宮怨云棄前方見泣船魚武陵長信宮詩云一從悲畫扇幾度泣前魚二詩又本陸氏謂是安陵元和姓纂云安陵小國其後氏之安陵

纏楚王妃故以爲宮人是也二詩本說安陵師道引以證龍
陽其疏一也師道未讀陸詩若依陸詩泣魚必妾則子瑕亦
宮人矣其疏二也楚策安陵君正注亦引姓纂以爲女子則
此正注當云正楚安陵之比乃云非楚安陵之比二處皆名
正注無所適從其疏三也師道惟補注多可取楚策云嬖色
不避席寵臣不避車蓋言驕寵也補注云文選注引嬖色不
樊席寵臣不樊車真誥言嬖色不傲席寵臣不盡輪則言榮
華易落寵不能久其義可傳秦策云美男破老美女破少乃
逸周書武稱解文補注云修文御覽引作美男破老美女破
車破車無意義誤文也

癸巳存稿卷十四終

癸巳存稿卷十五

黟俞正燮理初

何端簡父子事迹

何公世璵字澹菴一字坦園晚號鐵山其先世自棗強遷山東新城陳何莊公幼慧六歲喪母能持禮康熙甲子年十九舉於鄉需次得莒州學正以己丑進士改庶吉士散館授檢討充一統志纂修庚子山西鄉試副考官雍正元年正月授山西道監察御史二月充江西鄉試正考官七月提督浙江學政二年七月授兩淮都轉鹽運使經理淮揚海潮災賑是時公領運司鄂文端爾泰爲江蘇布政使皆處天下脂膏地

俱以廉聞三年十一月授貴州巡撫時鄂公總督雲南貴州廣西及將軍石禮哈提督馬會伯辦苗事公奏請

聖訓

世宗批其奏曰武備不可輕視苗夷雖蠢亦人也恩威不可偏用公自通籍翰林十四年自御史至巡撫才三年耳既任事宜上德意周咨山川險要籌撥軍儲值生苗頭目阿拏火阿猛阿戎等十四人赴公自懇奉行法度未嘗反公開示威信使轉諭各寨凡編髮受冠帶者賞以銀牌衣物耀之於其黨以是卉衣椎結之人傾心內屬得全活者萬餘人我兵方進攻下不服者谷隆長寨者貢羊城屯誅首逆阿革阿紀等

兵機大順公又以黎平都勻鎮遠之間古州八萬一寨地廣
千里南通廣西東界湖南土沃人稠物產尤富在三省腹中
由貴州黎平開之此寨得則附近九股黑苗可以勦撫卽會
總督奏調思州府張廣泗知黎平廣泗至卽輕騎趨古州登
諸葛臺盡望見苗寨高下及大小丹江出入圖其險要道徑
生苗大驚欲取之圍未合而廣泗從山背下得當以報公大
意旣示以威則撫之又保舉貴州人材貢生生員三十二人
五年十月被
召入都先是貴東道某以同鄉求保舉不許則參公徇情市
恩飲酒宴樂

上又以征苗事公屢言可撫恐與軍中意見相左故

召公而鄂公密奏公實心任事無他念公到京卽授刑部額
外侍郎六年二月轉戶部四月轉吏部仍兼刑部五月署直
隸總督公以才不勝外任辭甚切時天氣蒸暑汗出流被面
公旣辭不得請

上命侍臣爲何總督解衣賜人參克什紗表筆墨端硯因
垂詢生平稱意文字公進福字箴六月貴州人材兩次引
見

諭以人品尙屬端謹皆錄用之七年正月二十七日巡察南
三府御史過保定傳

諭使公愛惜精神而公已於二十六日卒矣年六十四遺表請祖父母封

詔書褒恤悉如其請加贈禮部尙書諡端簡內帑給千金治喪喪還所過有司支公祭奠八月改尙書秩一品乾隆元年追贈光祿大夫夫人徐氏晉一品太夫人公主試督學所得多端人歷封疆知人善任初抵黔時張公廣泗來迎馬上問地利民情苗俗行四十里未休至驛館語達旦凡事一以咨之張公亦功名自許雍正六年張公已爲貴州巡撫八年苗疆底定十三年又反乾隆元年張公以經略平之公子四體仁秉義崇禮蘊智體仁字西銘性恬淡年四十三始舉雍正

四年鄉試副榜八年旣葬端簡公入都謝

恩卽授浙江諸暨縣知縣縣人傅阿男者淫狡而肆持官吏短長爲一方害體仁窮治決遣之民大悅諸暨倉穀積弊儲不實具揭言之上官怒調於潛久之調奉化奉化沿海盜多不治體仁興修水利因以得近海舟楫來往盜所從逃竄之路以保甲弭盜古法取有驗編察得其窩線清其源令保甲輪直更鄉係統之使捕役分任邨屯捕頭統之調黃巖丁徐太夫人憂起復發江南辦銅山賑補虹縣知縣縣當宿州靈壁下流十載九溺其西北皆水地汎濫西南爲害乃開河西南洩其水治稻田製尿機貽民興木棉利取後調定遠築西

水石壩衛民田舍以耳疾乞老歸里體仁凡六任縣令奉家
教一果一菜不敢妄取廉俸所積於意氣之發地方公事所
捐亦豪往自喜在定遠時驛丞某年老矣馬瘦儲空當揭參
而不忍也使巡檢協治其事冀以漸而復上官驟察之丞革
職不得歸體仁置酒召之計公私所虧爲具印文清官項辦
裝送之歸體仁終已無餘財教子孫耕讀外不使逐他嗜好
所歷無奇行而士民思之自號長元人稱長元先生年七十
九卒

述曰征苗之役鄂公任之張公成之其間運籌勦撫端簡可
謂賢勞矣三公皆以征苗起功名之際何其盛也昔太史子

魚以義俠聞而不染縱橫之習軍旅方興以方行矩步者指畫其間並無猜疑自古難之張公後裔至今稱述端簡又得張公所輯貴州通志故得於齊侍郎所作傳外補緝之生平喜人稱說故事見長元先生狀與所聞合故附書其事公父子皆循循然無新奇可喜而後人樂道之非所謂惻惻無華者耶虹故魯紅也左傳注晉時猶有紅亭後漢沛國紅也虹以乾隆四十二年併入泗州今州治故虹治也

汪先生事輯逸

汪先生名廷榜字士瞻夥三都人同學稱仰山先生少學賈二十八歲置貨漢口見帆檣叢集蔽江面十數里人語雜五

方漢水衝擊江波浩渺縱觀之心動歸而讀書學文詞喜馳騁漸不自喜沈思刻意爲短章既又不自善也乃始爲平正曉鬯之文讀書江寧鍾山同舍生或窺之請與交者數人而已董以學梅鈐戴翼子戴祖啟侯學詩梁巘諸君子皆自好約爲背誦經史之會冬日訪先生值先生笑而出曰吾得之矣眾問之指牆下炭塹曰此立方也取圜與立句股就物推之耳鈐大喜輦其家所刊書贈之於逆旅晤戴震李惇與訂交學益廣中乾隆辛卯江南舉人授書饒州芝陽書院補旌德縣訓導以病歸嘉慶元年舉孝廉方正年老不就試受六品頂戴家資僅中人遇賢豪傾意結納之生平喜道人善獎

誘後進作文章經指授者皆有理法先生爲文下一字或檢書數十種務得其通不必古人曾用也務使妥貼有光采蓋得揚雄韓愈意者務使合語氣所著四書文名碧山草堂制義自言曰人各有所長經義卽未敢自信時文所言於事理不背而已文有大體吾自知之方先生讀書江寧時與何某出遊過王者輔寓者輔有日記日疏人事遂疏曰某日何先生偕汪兄來汪兄名廷榜黟人住三都碧山學士里有識見人也旣而者輔事敗官案日記索所往還人何先生汪兄俱錄赴蘇州按察司梁巖在亳州聞其事徒步至蘇候之事白人指爲道義交目曰汪梁先生懼名目遠布一日同梁飲噉

笑謂之曰若素不噉肥肉吾勸若始知其味吾素不飲若導
吾飲今亦不離杯罍矣吾兩人殆酒肉朋友也聞者皆失笑
其沈毅如此嘉慶八年七月卒年七十五

述曰嘉慶己未旌德劉君成書入都先生寄文集屬正燮校
定且曰刪竄惟汝癸亥七月先生病亟時適正燮歸里先生
持之而泣以文付其族孫夢桂及正燮八月正燮復出遊知
墓誌及傳已有所屬故輯其瑣事附碧山草堂制義後

胡先生事迹

胡先生梧字樹思徽州府城小北門四管人乾隆丙午順天
鄉試填榜吏誤連試卷實年實字書之遂名梧實其先世儒

者十一世皆學生父璿字澹中爲武學生弟珊文生也鄉試
不中澹中罵於市市人笑曰公武生也謂弟文佳文必不佳
不中宜矣悶而歸明年呈請文試遂舉於鄉成進士時乾隆
甲戌也越十三年丙戌弟亦成進士入翰林澹中終光山縣
知縣先生年十一侍母扶柩歸囊無一錢又無師傅爲無賴
喜與人鬥飢則竊書賣之日食於外母見書十耗其九則痛
詈之乃自投改過與二弟同讀書日負販於外夜讀書油錢
少鐙光如豆大兄弟三人環讀以夜半爲期自作文不求人
教也先是澹中君在時爲聘邑汪氏女及迎娶資送直千金
屬其兄弟爲變賣居積已授徒里中衣食稍有餘久之澹中

君有門生官杭州遣信召之至則官以事壞遇親串賣鹽浙中者假贖置湖絹往來揚州又置茶皆獲利時已納粟作監生值玉器貴乃盡以財買玉子解視多灰蠹又自甘肅來者日眾遂折耗接家信妻財又折耗念揚州親串多富者往投之不見收時小押中皆無賴欲得書生爲主謀見先生倜儻迎之去頗自危以計斂諸無賴分金買舟北上僦居旅舍天大寒天津某訪同院友顧見先生肥大面麻黑目長秀倚上胸背隆然裹二蘆花椅褥與之言曰才人也載歸久之辭之保德其知州素與澹中君善好豐坊大學所至刊行然能敬文人先生至使主講書院官日課講章先生不甚解則雜舉

古今成敗所歷山川人情淳僞以亂其言或阿官好叩以姚江之學曰姚江以學爲支離君言姚江而已何必誣以學也復入都強折節恂恂然不妄語然有忤之者輒登門升高坐大罵務盡其詞而歸人更校否亦不以增減其怒也鄉有爲部郎者語人曰胡樹思吾無法治之遠之而已先生聞之挾冊往登其榻酣讀終日出乾餼自啖至夜分謝之始去年三十中式充官學教習以知縣用值湖北請挑先一日謂弟桀曰吾入挑借支薄俸汝持歸奉母吾單身行矣赴挑不與借補中兵馬司副指揮曰吾昨買得堯峯文鈔方笑司坊官與阜隸伍今卽補是官豈非數也雖然吾不似鈍翁才拜印果

有院阜乘車從奴持刺來先生出坐堂上問坊阜曰院阜與汝品秩同也我見若當何禮坊阜無言使呼院阜已怒去以出迎遲也旣聞將挫抑之益大憤欲於院署肆無禮見先生氣甚盛轉怒爲笑曰是作官者乃似我輩無賴也視事三月出見一人強橫詐市賈財繫之歸將撻之已褫袴阜隸彷徨良久叩頭曰刑杖月前供應街道衙門偶未將歸先生瞠曰是矣我乃三月未嘗一撻人也當杖者伏地呼饒放之起罵曰吾好撻人苦無犯撻者汝不配啟撻端後受撻者道汝我識汝舍汝去再繫汝卽舍之中城竊案積年不獲問諸捕捕曰官考成我輩身家也不敢怠玩先生笑而頷之曰然五日

又問之荅如初先生怒詬曰奴真欲死耶官考成汝何知我知杖汝而已不需汝身家也五日不獲諸偷者汝不欲活矣四日而獲十七案然終未撻人也某者居雲居寺衲衲抑勒人妻事將成矣先生過楊梅竹斜街見之止車告之曰明日事若當自止吾知彼婦無恥不足惜本意明日將吏拘若兩人以耀吾官忽見汝不能自禁以告汝言已驅車去某大感遂止京城偵事者素狡不以實又持官短長先生故挫抑之使偵刺報命惟謹日近詩書所轄無廢事讀史記曰廉吏久以益富不可信也官多妄費而吾衣食裕於教讀時吾不廉人不能知也宦游京師者託事請客斂分金曰撒網司坊官

十五十四俱已請客意不能無動倩人畫例借屋校尉營賃盤盂几席結采召廚人梨園子弟俟代支客者已到乃衣冠乘車往禮客中途忽忤忤驅車返使人稱疾多謝客多酌加飯迨暮家人載金歸先生視之笑曰廉吏之富其以此耶此吾在揚州故智也嘉慶二年十二月補官四年十一月卒先生之言曰吾生平閱歷多矣惟不忤求能自保不能屈抑誠自苦然碌碌者安可託也卒以病肺年四十三意氣平矣子元鼎全鼎文鼎

述曰胡先生眞循吏也生平所行發乎情止乎禮義合聖賢之法正變記先生事甚多先生素惡鄉愿因以所記徧求所

謂鄉愿者下意延問凡經指示許可之事悉去之故所存止此嗚呼此先生所以賢歟其精神在是矣

駱君小傳

駱君正綸字金門號紫封句容石橋人居城東爲人淳重自愛能文章乾隆庚子句容書生某求督學關節有人持金去某隨之急乃還其金妄言學使已許之矣旣而不許某怒擗童生有文章者二十五人先出榜一日張於院外廟壁以君爲第一迨曉榜出名字同者十人而君果第一學使聞之怒屬吏窮捕或怵君君曰此無與我事也不爲動事亦不及之好爲閒散遊登邑中雲龍自馬背岡望茅山三峯若有若無

吟歎自得於人無可否以爲性情形狀皆天賦不能強同以
己見非笑之坐不通也惟不喜人戴近視眼鏡聞鼻煙其說
曰古無眼鏡時人已有目今人多苦鼻柱耳鼻煙學嗅者淚
潸潸下氣息出入腥動數尺外非天性所有故可惡聞者歎
其言可爲故實性不能飲一日攜酒偕友人於邑小南門外
五里岡痛飲流連作詩刻樹皮識焉復坐言鬼神事甚悉忽
歎曰故鄉可樂再三言之歸十日而病初某以揭榜事用狡
計脫而爲眾所詬鬱而死死十三年矣其兄病請君臨訣君
至某現心惡之某兄死君亦卒年四十五時乾隆五十七年
五月也黟縣俞正變在句容聞之歎曰吾極知鬼神事然不

分人有死也今駱君死則真有死矣五月晦夢遇之於四牌樓諱言其死也語之曰君家人甚思君胡久不歸曰死人耳明日月朔歸人將以爲不吉且緩之吾有事赴城隍司有關不易過煩送我從之南行東轉過文廟出德配天地坊又東循兩池間北行卽城隍司廟屋與日所見同堂下人百狀不齊堂上寂無人直上轉後屏望見顯應閣院落比素見大數十倍中有河橫去南北屋宇羅列向所未見也相將過河西轉有屋南向面河近就之忽小矣屋高三尺廣不及尺深半之分兩層上層有龕一長眉人持瓶插河柳趺坐有二人侍人持一棒若羯鼓椎空中一棒跳躍細長與所執者同二人

擊弄之盤旋上下聲捷然睇視人亦長大龕後右邊空處審是樓梯下層閉細紅櫺扇紅紙粘似非惡處曰此關也送之過而醒甚駭歎過數日正燮持燭如廁見一紅物負牆高二尺餘俯視之頭忽大若穀箕面皆血也見之不甚畏懼已過心忽怯奪路返物已不見歸坐不樂同學某生聞之鼓掌笑曰大丈夫豈畏鬼哉無何生閉門臥忽大叫甚急鄰舍生持火噪門外始起開門入其室腥臭不可聞生面如死人徐言曰才臥聞門響甚厲自蒙被中有物自被上過如廟中天王手大從首至足所揣處冷徹骨繼聞物歎詫嘶破不是人聲昧死大叫幸諸君至聞者股肉起若栗勸生抱被鎖門從他

人榻畔臥翼日生無言正變往君柩前祝曰君有靈當助我
逐鬼也是夕夢君至笑曰責報一何速耶子一人重基監生
述曰正變於嘉慶甲子重到荷澤窗外丁香將放理剔澆灌
日夜俟之春風料峭從未閉窗臥也急欲往濟寧夜懸紅鐙
醉酒別樹倚檻而寐夢駱君至看花歡笑驚起人靜鐙熄矣
旦將束裝北枝全放時二月十日也神理常存難與庸惡無
氣者道念小時一句一字駱君皆奇賞之今知駱君果不死
追憶去年冬平度于君重輝鄒平成君瓊新城何君承壯同
泛張秋泐河四人坐船蓬上說鬼風霜淒緊潰瀾攢擊真有
神物龍魚來傾聽也既來泰安無人談者感丁香偏放之異

因述駱君之事嗟乎知己之感索居之歎生人豈能無之耶
音塵寂斷亦可悲矣

古築兩孫君小傳

孫學道字立人居黔四都古築縣學生也乾隆間邑人能讀
書者汪燾朱鍾何瑞龍鮑元俚程驥葉有廣胡成浚皆有業
有異稟不同於俗學道好學能博覽其識通敏文選漢高功
臣頌注引漢高帝會陳擒韓信此特萬世之事也友人質之
學道曰萬世乃万士之譌万士乃一力士之譌也陸機五等
論注引漢書燕齊之間萬士瞋目扼腕萬乃方之譌與此同
檢漢書果然熟於經史言事有條理喜爲詩尤善五言程驥

日黥有二絕大星樞子孫立人五言古詩也所娶妒戾乃異
居有二子亦夭其詩散失所有古書丹黃粲然有發明亦未
輯錄實爲寡婦食矣

孫蒙字養正布衣也幼學神仙年四十兄死乃強復持家好
數學皆穿穴之通於易其治易喜言人事其言易分爲五一
爲易緯推乾鑿度七書之數及易九厄二爲易支曰易林曰
京氏易傳曰元包曰皇極經世曰三易洞璣曰九宮經緯附
京氏後以洞微數三爲易流曰八陣曰金丹曰地理四爲易
跂曰太元曰洞極曰潛虛曰皇極洪範曰參兩曰範衍曰太
微曰括奇曰靈棋五爲易衍曰龜卜曰岷法曰太素岷曰五

運六氣曰太一曰奇門遁甲曰六壬曰演禽曰璣衡曰風角
皆究揲灼布推加減飛行診望之法爲采文補注附說爲作
表摺撫奇肱比輯之得十五卷曰周易外傳謂通卦驗不知
里差難施用易九厄多見道書太一家其法本三統當以三
統法置元推之不當雜用他法亂其數又以太一推上元至
嘉慶癸亥積千零十五萬五千七百二十年加陽盈差一百
三十而以周法四千五百六十除之旣又得一法推筭爲八
萬六千零四十年又一法積五千二百九十五萬一千零八
十年又一法積四百五十六萬七千零八十年俱存其數以
證古筭家積元不同由其術異非乖謬也西法言開闢至順

治甲申六千八百四十年依其定儀推之止五千七百三十四年則與術不相應其言周易年周法年一爻運周法陽爻九年陰爻六年世周法陽爻三十六年陰爻二十四年紀周法陽爻九十年陰爻六十年崇德元年丙子年爻值乾初世爻入坎初言世驗堯值師水行地上洪水之效禹值比後夫凶戮防風氏之效唐高宗儀鳳值剥五以宮人寵武后同聽政之效久視值剥上碩果不食中宗復位效也或疑師比義曲蒙曰隋書王劭傳引稽覽圖屯十一月千里馬數至應隋高祖騶騶馬震下足坎上美脊騶騶有肉鞍行則作動四足數至者天祿數至晉書王嘉傳苻堅問世祚嘉曰未央明年

癸未敗於淮南所謂末年有殃占驗之解當如此如祈神籤亦斷章取義也蒙學古雅家貧爲人相宅墓取錢以給家卒於家子繼祖

述曰孫君立人學博而正真儒者惜其書不存養正又通音韻之學亦無書可惜也兩君嘗學辟穀住百尺段石人祠六七日不能堪扶杖歸雖爲俗人口實然亦古雅矣

書李方古

嘉慶元年丙辰正月十一日白蓮教匪劉松餘孽劉之協之黨犯枝江宜都繼而當陽繼而新野蔓延四出而豫而秦而川所至摸卹驅去良民使當官兵鋒官命民間立寨集鄉勇

自衛汝陳諸俠素販鹽游博者千餘人籍團練名益收諸無賴方行無所忌分屯數十處其取强者東潁州曰陳魁元西汝寧曰李方古魁元素暴悍借交報讎私梟自淮泗渦汝連舳艫數十而上或相連數百車嘯唱謹譟過鋪汛不敢誰何方古循循然退讓文秀類書生郡豪傑皆敬憚之訟爭不解者得方古一言卽聽千里內皆慕方古時鄉勇皆有梟雄爲之主令行禁止或亦爲民害方古所統有仁義風任俠者互吞噬於方古不相屬而李氏股中傳令索餽借餉未嘗有違者河南王生挾萬金商於蘇州有盜尾之數日王生急投方古盜念方古人多旣識王生卽千里之內不敢動舍之去又

不甘亦投方古告實方古大驚以擾攘之際不敢與爲難且喜其已歸也厚貽之使之遠去行旅皆載方古名以行河南巡撫知之遣陳州知府越境覘方古以無惡迹歸報方古亦自危謝其眾不復見客二年閏六月息縣民張雲路械鬥遣使借力於魁元魁元以五十人往至則事解無所用其武雲路憶數年私鹽爲息縣役所沒欲從眾至城罵其知縣使知縣訓其役放張氏私販也僞爲他邑解囚者數十人執械護之至庭拉散囚車索知縣知縣以事上州轉至外委把總向得琳解得琳念倉猝不敵且用好語慰散之有新附禿者鮑六負莖煙葉刀自後至謾曰是官耶我不與之言卽斫之死

而鮑六貿貿然負刀歸雲路魁元見事急至縣奪馬轉殺由正陽羅山轉至光山界河灣遇其黨詹三方古股中向所分也邀魁元入偵知其黨殺官劫馬事涉反託言過河鳩集旣渡則盡撤船以南射書絕之曰本出姓名要言其拒反者今殺官若爲

天子所赦者請續前好不然卽渡河亦無所歸也魁元得書沿河譟罵詹三怒厲兵渡河大敗之魁元跳歸方古欲鳩眾自守方古曰今大軍逐教匪逃死誠易然反者終伏罪徒爲罪人累鄉里耳且若家室何不如自投以爲官兵功庶幾官宥緩之家人萬一全者魁元不復語七月初自詣項成獄六

日河南巡撫至誅魁元等五人而案結官益以方古勢大不去之終爲害以魁元識方古遣戍之方古亦自喜於遠去也其時汝陽有俠曰大都督武藝敵千人其黨亦千人巡撫至汝寧令汝陽知縣捕之知縣至其家其黨圍之大都督曰我無罪汝等從我卽我罪我去汝輩以安但好爲之無爲教匪所笑也且誠之曰無事不可聚會揮眾退從知縣至城巡撫數其罪斬之蓋河南潁亳之間自古游俠所聚雖以武犯禁妨吏治而大義不敢踰有足多者冀大榮者葉人也素梟勇負販於外遇賊摸邨縛之去謹防之默識賊旗鼓字號大師傳劉之協閱各營時擁衛威儀甚盛大榮微窺識之久之使

樵汲遂逃歸爲無賴以自活之協各股在陝西者被雖欲於河南復立一股爲聲援五年六月之協至汝州遇其徒邾縣李岳岳在教中位已尊所屬數百人州之鬧店有徐華平李運泰者向客李方古家拳棒號無敵岳啗以利欲其入教則納其賄岳又遣妻女至其邾游觀會劇授以色誘之入教則又淫之終不入教岳大恨而之協至乃起兵先攻鬧店適二人外出教習則躡其家屠其邾取慘轉掠至翟家寨之協下令摸邾邾民相聚謀曰坐待逃竄皆死也今與之戰幸而勝賊終身不我犯卽敗保寨以俟官兵至則我生矣出戰賊敗賊反得寨據以守徐華平李運泰得耗糾二十七人前追賊

遇布政使馬公至從之踰溝圍寨談兵者日當開一面合兵
法自七月六日丙子至八日戊寅雞鳴寨破二人報讎痛殺
賊追奔數十里而餘匪竄於彭山巡撫吳公自南陽撥兵至
魯山嵩縣界遇之戰於過風樓又戰於米兒溝十四日盡滅
之方初八日之破翟家寨也擒僞元帥李岳僞總兵孫繼元
寨中樹劉天王旗殺賊旣盡徧搜之協尸不得兵民且恨且
懼而葉縣馳報生獲之協初之協欲以辰年辰月辰日辰時
起事而其徒寅月起至是又以寅日敗之協將逃之湖北過
葉縣日昃矣冀大榮方與人鬥而勝提壺沽酒自賀闐然遇
之大師傅也念驟執之或致死時無質證是以人命自累也

追隨於野詭稱某股使歸募兵者今得千人之協信之從之
 收兵乃執以予知縣廖君寅殺豬狗取血塗之之協到部依
 大榮言陳之堅言大榮是其頭目欲與之同死而大榮以無
 賴鄉人懇之者日月有案其陷賊供樵汲僅一月乃得免或
 曰其人姓楊名弼亦方古黨內人也

廣東阮宮保六十壽引集香山文句

皇帝嗣位

畫大羅天尊贊序三年

三年

李公家廟碑

正月二十日

醉吟先生銘序

東控

嶺海右扼蠻荒

嚴謨制

自和氣聚為慶雲

與柳晨詔

壽星垂文

與顏証詔

當其冥同訢合之際

為人上宰相書

以彰我主聖臣良

敢諫鼓賦

精究之

端

才實兼茂明於體用策

於是乎在矣

策林二十七

惟公受天地之和

代裴頠作

王府君銘生

休明代二十有六年箴言始以進士舉策林善慶所集崔孚

揚其祖美楊冠有理戎殄寇之效康溪讓等制公掣經室

德善者將啟後人張懿詩禮弓裘鳥行文章政事范傳冠於

一時高敖曹豈不宜哉策林公為人崔孚抱乎不器之器君

不器淵淵絲絲珠求元美而有度賦玉立不倚裴垣名實相副

舉人自崔嵬士林推美崔嵬以為準程李公家如神仙中人也崔

叔誌奉

詔而處中侯丕立

內廷微之賜紫歷踐清貫歸登每備

癸巳存稿 卷十五 十六 連筠蓀叢書

顧問

李絳制

周知典故

康承宣制

日麗

天仗

叔孫通定朝儀賦

吟咏

秘閣

王建制

以茂學懿文

裴度舍人制

頌成功

中和節頌

發揮盛祉

元和中南省

表美歸

聖德

論魏徵舊宅狀

公至越

徵之銘序

久專外閫

程執恭制

召入翰林

李公家廟碑

擇在

禁闈

謝蒙恩賜設制

俾升瑣闥

寶易直制

而翱翔書府

王建制

潤色訓詁

裴度

舍人制

煥乎文章

中和節頌

嘉猷茂績

杜佑太子太師制

慶集台庭

裴度舍人制

文質詳略

沈傳師制

垂之不朽也

禮部策一又由浙撫入

公由少詹至侍郎皆為翰林侍郎時皆

直南書房

夫文武迭用

魏元通制

海沂之間

王智興制

詢謀馳驅

楊孝直制

全越

奧區延袤千里

丁公著制

可使考文以第俊秀

韋貫之侍郎制謂出督山東浙江

學政協

聖人之昌運

黑龍飲渭賦

詔主文之司

策林六十八

惟四科六藝

箴言序

警策之篇

與劉蘇州書

優

遊而求之

禮部策三

兼取人材

論重考科目人狀

采而獎之

策林六十八

作者

之風

代書

由文取士

李善人碑

為主司則至公矣

與陳給事書嘉慶己未科總裁

謂

洎出分戎律

李廣制

俾換

新命再臨舊邦

崔鴻重授刺史制少農出撫浙舊督學地也

天地澄爽

叔孫通定朝儀

羣山結青

洛川晴望賦

太白星高

范希朝制

皇靈有截

賀平淄青表

擘波騰驤

黑龍飲渭賦

以堅甲利兵相視

斬白蛇賦

駭泉室則寵鼉伏藏

黑龍飲渭賦

流光垂慶

上元歎道文

咸有忠勳播

為先德

程執恭等文集推闡封公省會中籌備示畫

動修武經

程執恭僕射制

明練兵符

閻巨源制

不替前效

李夷簡制

其在茲乎

策林五十九

召赴闕廷

崔羣制

有恪恭跋涉之勤焉

夏侯仕戡等制侍郎又出使河南交審

公補

事式示寵名

崔楚臣制

控轉輸之路

柳經李褒制

統以上卿

裴宏泰知左藏制

以叶便宜

盧生攻制

聖澤汪洋

洛川晴望賦

如運神功

中和節頌

虛舟為心

孔殘制

若轉於掌

荷珠賦

公在浙撫陳海運不可

河洛千里

許孟容制

出領重鎮

嚴綬

案其度程

裴武制

文以禮樂

張宏靖制

河南宴如

韓宏制

嘉

衛輝見公札府州縣官買經史古書置儒學其意甚盛今御

史乃請令人誦理學平話書時道光壬午臘月廷議尚未上

憶前有學政請令人默寫朱子小學者以此益念公教人有法焉自長安抵江西三四千里

與微寄深南服與鄭兼文武之秩段佑制江西撫及事鄰

古人制袁滋有思興禮樂之道才識兼茂明于體用策公以

昌府學并附刊校勘記人物教化制崔陵故稽其地籍策林四量人戶之

眾寡策林五實版圖策林五十骨肉相係荅崔侍兇徒蕩滅

與崇妖沴自清代荅論結都離書謂江西務叢而益辦張

文詔制自移部荆門趙昌我

國家策林十五憂襄漢之人也制袁滋勵精一意王日度才而授職

裴珣制登進賢哲張宏優劣之間策林四經緯其人焉進士策

以禮導人情策林五使人畏愛悅服策林五澤鋪動植中和

十四策林五連筠簞叢書

隨材曲直

君子不器賦

物無遁形

明

皆得如本願焉

畫彌勒上生幀記

遠

圖是經

裴均

移鎮南海

趙昌

公既下車

李公家廟碑

軍國所資

與盧

恒卿

依法有程

大巧若拙賦

舉德選能

策林五十八

才適其位

大巧若拙賦

賦役均平

策林五十二

人安則心固

策林四十八

故臨戎則士樂爲用

田穎

筦榷條制

裴宏泰權鹽使制

謹鹽量之出入

策林二十三

主計無愆

違制

崔陵

沉湎漲一隅

新羅金忠良制

滄波萬里

與新羅王書

華夷雜居

李夷

簡

有軍課者

王璿制

服勤靡盬

黃士儉制

風變化移

李公家廟碑

夫惟不

皦不昧

求元珠賦

布寬簡有恒之政

吳少陽制

誠信明則獷鷩歸命

才識

兼茂明於體用策

至矣哉

敢諫鼓賦

威綏仁董

冊新回鵲可汗文

啟迪雍熙

上元日歎

道

亦惟舊典

與仕明詔

公冠其首

代裴頌作王

教化之根

動靜交相養賦

居

其要也

策林四十九

且臻乎仁壽之域矣

禮部策二

凡所踐歷

杜羔制

自

江而東政成人又

薛戎制

梁宋之交

韓宏制

荆揚浙右

孫簡等制

連鎮

藩維

韓皋制

兼進榮班

高榮朝制

式是南邦

嚴謨制

寵任益崇

韓公武制

殆

三十年

嚴綬制

公涖山東浙江淮安河南江西湖北湖南廣東廣西以外臺得尚書宮保

夫外擁旌

麾

與韓宏詔

其務甚殷

與盧恒卿詔

或千里移鎮

夏州軍將制

使布和惠之

化

薛元賞制

至於瀑泉怪石桂風杉月

荅崔侍郎書

或花時宴罷

與微之第

二書

觴詠半酣

白蘋洲五亭記

文彩陸離

黑龍飲渭賦

或傳諸好事

九老會詩序

振金聲於寰海

賦

故其所著章句往往在人口中

王建制

惟雨

露之留處

荷珠賦

則三山五岳

太湖石記

靈蹟勝概靡不周覽

修香山寺

記

膏雨景星所至蒙福

李公家廟碑筆談及金石諸書

夫公之文學

張擇碑

以儒學詩賦獨步一時

張仲方銘序

而聖人之旨

代書

暨於百氏

補逸

書既又與諸家不同

論魏徵舊宅狀

循義討源

中和節頌

或致疑誤

奏所聞狀

慎簡賓客

太湖石記

取天下耳目心識為用

為人上宰相書

得遺編墜軸

者

香山寺新修經藏堂記

約義立宗

三教論衡對僧問

盡得其義

李善人碑

刻樊句

微之賜紫金魚袋制謂不采唐以後諸鄙文

文合法要

寶易直制

雖言微旨遠

禮部策三

推

而敘之

傳法堂銘序

則六家九流

策林六十一

同歸於一揆矣

禮部策二

然

後知學在骨髓者自心術得

記

豈牽強所能致耶

序洛詩

學術

精博

韓愈舍人制

超軼古今者也

賦賦謂十三經校勘記經郭經籍纂詁等書

公養有

餘力

李善人碑

及居憂

榮陽鄭公銘序

聖人不得已而奪之

邊鎮節度使起復制

念臣為子之心

謝官狀

用表教

忠之訓

與薛萃詔

進退出處

與微之書

不失其道

蕭俛吏部尚書制

雖古君臣

道合者

爲人上宰相書

蔑以加之

范傳正制建以病得假

服闋乃補

雷塘表墓起撫福侍郎出爲

督撫允矣君子

叔孫通定朝儀賦

取是大節

奏所聞狀

由是言之

禮部策一

國典褒飾

李公家廟碑

不亦宜乎

李諒薛公幹制

皇帝孝敬寅畏

畫大羅天尊贊序二

肇撫蒼生

爲人上宰相書

志在繼善

畫大羅天尊

尊贊

以恩信御百辟

與金陵立功將士勅書

公獨超然

皇甫公銘序

久於其

政

李正卿制

勞績彌彰

與希朝制

優詔褒美

張誠銘序

用旌前勞

張正甫制

外諸僉議

王泌制

以爲至當

論嚴

狀忠忱亮節

與仕明詔

昭昭然可知矣

禮部策二侍御鑒奏久任大吏

大凡

公之爲政也

李公家廟碑

夙夜祇

命

崔陵制

動靜有儀

黑龍飲渭狀

故庶類曲從

君子不器賦

安業厚生

林策

五十

福利動植

祭匡山文

則冲而用之

荷珠賦

可以導知納粹

冷泉亭記

播於無窮

續虞人箴序

庶臻康濟

吳少陽制

日濟其美

張宏靖制

皇風演溢

洛川晴望賦

家聲振耀

李公家廟碑

沉霑

慶澤

裴度等賜子官制

許推恩而及嗣

李愬等制

三和之氣訢合細縕積

為壽

策林十七

公受天地粹靈

微之銘序

工倖造化者由天和來

畫記在

氣為春福不得不集

畫西方幀贊序

在使之壽貴富

策林七十三

輔而成

焉

長生久視之道

二教論衡問道士

實在於此矣

才識兼茂明於體用策

式會嘉辰

三教論衡序

流為詠歌

泛渭賦序

僉以為宜

盧士致劉從周制

粗寫

鄙意

與楊虞卿書

引而伸之

明達碑

道光壬午冬十二月京都多作壽文寄廣東者因看正定
李寶臣碑有王士則名檢香山集見白公以正月二十日
生亦宮保生日也旅邸夜坐因集此文宮保爲余座師之
師適未出淨本亦以語有狷激漢陽葉年丈取去塗改用
之乃極和平韓愈月蝕詩鄭亞會昌一品集序盧同李商
隱集均存之見文章異同有法也小除日記於黟縣會館

癸巳存稿卷十五